

Naalakkersuisut peqquneqarnissaannik Inatsisartut aalajangiiffigisassaattut siunnersuut, kingusinnerpaamik FM12-mi peqquneqassasut, pilersaarusiortarneq aamma nunaminertamik atuisarneq pillugu Inatsisartut inatsisaata nr. 17-ip 17. november 2010-meersup allanngortinneqarnissaanut Naalakkersuisut siunnersuusioqqullugit, taamaasilluni inatsisitigut tunngavissaqalersinniarlugu inuk inuilluunniit nunaminertamik tunineqarnissaminnut qinnuteqartut pilersaarummik piariikkamik ilanngussisalissasut kiisalu nammineq akiliisinnaanermut uppersaammik. Tamatuma saniatigut nunaminertamik tunisinermut atatillugu piumasaqaatigineqartalissaaq, qinnuteqartup pisussaaffigisalissagaa, sanaassatut qinnutigisami, akuerineqarnermiit ukiut marluk qaanngiutsinnagit sananissaanut. (Inatsisartunut ilaasortaq Justus Hansen, Demokraatit)

Akissuteqaat

(Ineqarnermut, Attaveqarnermut Angallannermullu Naalakkersuisoq)

Siullermeerinnineq

Naalakkersuisut sinnerlugit siunnersuummut oqaaseqalaassaanga, siunnersuutip kingunerisassai sukumiisumik isumaliutigineqartariaqarmata.

Kommunit arlallit ullumikkut nunaminertanik atugassiisoqannginnerani sanaartugassatut qinnutigineqartup ilusaanut aningaasalersorneqarnissaanullu uppersaasaaqqusisarput. Taamatut uppersaasoqarnissaanik piumasaqaateqarneq inatsisini tunngavissaqarpoq, taamaattorli pilersaarusiortarneq pillugu inatsimmi aalajangersagaanani. Akerlianilli uppersaasoqarnissaanik piumasaqaat kommunit ataasiakkaat kommunimut pilersaarutaanni aalajangersarneqarsinnaavoq.

Ullumikkut pilersaarusiortarneq pillugu inatsit illuliornermilu malittarisassat ataqatigiissillugit atuutsinneqarput. Sanaartortitsisoq nunaminertamik atugassinneqaraangat nunaminertamik atuisinnaatitaanerup atorneqarnissaanut ukiut marluk piffissaliunneqarajuttarput. Tamatuma saniatigut sanaartornissamut akuersissummik naammattumik qinnuteqarnissamut ukioq ataaseq piffissaliunneqarajuttarpoq. Suliaqarneq ukiup ataatsip ingerlanerani aallartinneqarsimangippat sanaartornissamut akuersissut atorunnaartarpoq.

Taamaalilluni nunaminertamik atugassiissuteqarneq sanaartornissamullu akuersissut ataatsikkut atorunnaartarput, taamaattumillu aamma allannguutissatut siunnersuutit akuerineqassappata illuliornermut malittarisassat iluarsanneqarnissaat pisariaqalertussaavoq.

Nunaminertamik atugassiinissamik nalunaaruteqarnermi suliassap qinnutigineqartup ukiut marluk ingerlanerini sananeqarnissaa pillugu siunnersuummut tunngatillugu imaappoq, nunaminertamik atuisinnaatitaaneq ukiut marluk iluini atorneqassasoq. Tamatumani imaattariaqanngilaq sanaartorneq naammassereersimassasoq, taamaallaalli nunaminertami nunamut aalajangersarsimasunik tunineqarsinnaasunillu naleqartunik pilersitsisoqarsimassaaq.

Nunaminertami nunamut aalajangersarsimasunik nalilinnik pilersitsisoqarsimangippat atuisinnaatitaaneq atorunnaassaaq pisinnaatitaasumullu allamut tunniunneqarsinnaalluni.

Nunaminertami nunamut aalajangersarsimasunik nalilinnik pilersitsisoqarsimappat atuisinnaatitaaneq atorunnaarsiinnarneqarsinnaanngilaq, tassami piginnittoq sanaartukkaminut isersinnaatitaasussaammat. Pilersaarusiortarneq pillugu inatsimmi ullumikkut pisinnaatitaasup nunaminertamik atugassiissutigineqarsimasumik atuinissaanik peqqusinissamut periarfissaqareerpoq. Tamatuminnga unioqutitsineq akiliisitaanermik kinguneqarsinnaavoq.

Taamaattumik Naalakkersuisut isumaqarput pilersaarusiortarneq pillugu inatsit atuuttoq allanngortinneqartariaqarnersoq isumaliutigineqartariaqartoq? Paasinninnera malillugu ajornartorsiutinik taakkartorneqartunik aaqqiinissaq, inatsimmik ullumikkut atuutereersumik pitsaannerusumik atuutsitsinissamiippoq.

Siunnersuutip pisortanut aningaasaqarnikkut allaffissornikkullu kingunerisassaanut tunngatillugu Naalakkersuisut oqaatigissavaat siunnersuummi aningaasaqarnikkut allaffissornikkullu kingunerisassat siunnersuutip kommunini ingerlatsivinnut nassatarisinnaasai erseqqinngimmata. Aalajangiiffigisassatut siunnersuut akuerineqassappat kommunit sanaartornermi teknikimut tunngasunik nunaminertanillu qinnuteqaatinut tamarluinnarnut atatillugu aningaasalersuinermit tunngasunik pissarsiniarlutillu nalileeqquneqartartussanngussapput.

Naalakkersuisut taamatut oqaaseqarlutik siunnersuutigissavaat aappassaaneerinninnginnermi aalajangiiffigisassatut siunnersuutip pitsaaqutai pitsaanngequtaalu kiisalu periarfissaareersut isumaliutigilluarneqassasut.